

Curriders sursilvans sil podest a Puntraschigna

Bunas rangaziuns per Cla-Ursin Nufer
al Cup dallas Alps

■ (fmr/hh) La fin dall'jamna passada ein curridras e curridders sursilvans separticipai a cuorsas dil Cup dallas Alps a Travisio el'Italia ed als Campiunadis grischuns nordics a Puntraschigna. A Travisio ei Cla-Ursin Nufer dil Club da skis Sedrun-Tujetsch daventaus otgavel ella cuorsa liunga dil stil classic sur la distanza da 10 km. Rondund 80 ein separticipai en quella categoria dils umens sut 20 onns. Ella cuorsa libra ei lu reussiu ad el igl endischavel rang ed el sprint ei il Tuatschin daventaus 25avel.

Al campiunadi grischun a Puntraschigna ei Otavia Vonplon da Castrisch daventada novavla ella cuorsa dallas mattatschas sut diesch onns. Communablamein cun Alea Lofthouse, medemamein dil Club da skis Castrisch, ha

ella contonschiu il tierz rang ella staffetta.

Ella categoria dils buobs sut 12 onns ei Yann Lofthouse da Castrisch daventaus 18avel ed ella categoria sut 14 onns ha Matia Friberg dil Club da skis Sedrun-Tujetsch contonschiu igl otgavel rang. Il tierz rang ei reussiu a Jon-Fadri Nufer da Rueras ella categoria dils giuvens sut 16 onns. En quella categoria daventa Clau Deplazes dil Club da skis Trun otgavel e siu camerat dil club Elia Sassi novavel. La medaglia da bronz ha ei era dau per Niculina Nufer da Rueras ella categoria dallas damas sut 18 onns. Lena Kropf dil CS Trun ei daventada campiunessa grischuna tier las damas sut 20 onns e Fadri Schmid da Sedrun ha acquistau bronz ella categoria dils umens sut 20 onns.



Cla-Ursin Nufer ha mussau bunas prestaziuns al Cup dallas Alps.

FOTO H. HUONDER